



*Iesus ayant nettoiyé vn ladre, l'enuoye aux Sacrificateurs; & guarit le seruiteur du Centenier.*

**Q**UAND Iesus fut descendu de la montagne, vn ladre se ietta à genoux deuant luy, disant; Seigneur, tu me peux nettoyer: Iesus ayant compassion de luy, dit; Je le veux sois net. Va te montrer aux Sacrificateurs, & offre le don pour la guerison de ta lepre, que Moysé a ordonné, & ne manifeste à personne ce qui est fait: Mais il ne se pût tenir, qu'il ne manifestast par tout la gloire Dieu. Dont toutes gens y vinrent de toutes parts pour estre guaris. Or Iesus se retirant en Capharnaum, vn Centenier enuoya les Anciens des Iuifs prier Iesus de guarir son seruiteur, qu'il ymoit. Aquoy Iesus obtemperant s'en alla avec eux; mais comme il estoit près de la maison, le Centenier luy enuoya dire par ses amis; Seigneur, ne te trauaille point, car ie ne suis pas digne que tu entres sous mon toict; c'est pourquoy ie ne me suis point réputé digne d'aller à toy, mais dy seulement vn mot, & mon garçon sera guaruy. Aquoy Iesus dit, Je n'ay point trouué si grande foy en Israël; & quand ceux qui auoient esté enuoyez furent retournez en la maison, ils trouuerent le seruiteur qui auoit esté malade, en bonne santé.

*S. Matthieu Chap. 8. S. Marc Chap. 1. S. Luc Chap. 5. & 7.*